

Iyyannoo Barattoota Oromoo Dhaabbilee Barnoota Olaanoo Hunda Irraa Dhiyaate
Iyyannoo Barattoota Oromoo Yuunibarsiitii Harammayyaa
Bulchiinsa Yuunibarsiitii Harammayyaaf

Harargee

Nuti dargaggootni barattootni Oromoo yuunibarsiitii **Harammayyaa** DUULA cunqursaa fi Gidiraa Maqaa Master Plan Finfinnee fi Magaalota Oromiyaa Federaala jala galchuuf Caffeen Oromiyaa raggasisee jiru wayita dhageenyetti gadda guddaatu nutti dhagaa'ame. Uummatni keenya Oromiyaa badhaatuu keessa utuu jiruu mootummaa isa misoomsuu fi mootummaa wabii uummataa dhaabbatu dhabuun balaa beelaan lafarraa duguugame dhuma jiruu yeroo aginuutti obsinee tenyee ilaaluuf boqonnaa dhabnee waan jirruuf iyyachuuf dirqamnee jirra. Bara 2014 Karoora master plan Finfinnee hin fudhannu jennee gaaffii mirga abbaa biyyummaa karaa nagaan waan gaafanneef mootummaan EPRDF/TPLF/OPDO jedhaman humna waraanaa of harka qabu nurratti bobbaasuun ilmaan Oromoo dhobbootaan lakkaa'aman daa'imman ganna 8 hanga manguddoo ganna 80tti kanneen umriin isaanii keessatti argamu dabalatee ilmaan Oromoo guyyaa saafa loltoota mootummaan ajjeefamaniif mootummaan itti gaafatamummaa fudhachuu diduun dhiiga ilmaan Oromoo irra ejjechuun karoora master plan Finfinnee fi Karoora Magaalota Oromomiyaa Federaalaa jala galchuuf dabballoota mootummichaa kan maqaaf ' Caffee Mootummaa naannoo Oromiyaa' ofiin jedhan karoora master plan Finfinnee fi Magaalota Oromiyaa federaala jala galchuuf karoofame kan raggasisuun gadda gadda caaluu nutti ta'ee jira. Akkasumas Gaaffii mirga abbaa biyyummaa,qabinsa mirga ilma namaa fi dhiitamuu mirgoota dimookiraasii ilaalchisuun ukkamsaan uummata keenya irra waan jirruuf uummata Oromoo irraa ukkamsaan Siyaasaa,Ukkamsaan mirga namommaa fi Ukkamsaan dinagdee daran jabaachaa dhufuu irra yaaddoo keessa galtee gaaffii keenya karaa nagaa dhiyeeffanneef hanga guyyaa har'atti deebii tokkollee dhabuun jumlaan hidhamnee, ajjefamnee fi barnoota irraa arii'atamuun dhimmi irratti dararamaa turrefi ilmaan Oromoo qaaliin itti wareegaman har'a immoo hojii irra olchuuf mirkaneessuun tuffii uummata Oromoo waan ta'eef mirga uummata keenyaa sarbamaa jirruuf falmachuuf karaa nagaa gaaffii keenya utuu wal irraa hin kutiin dhiyeeffachuuf dirqamnee jirra.

Uummata Oromoo fi Dachee Oromiyaaf Karoorri Maaster Planii Finfinnee fi Magaaloota Oromiyaa Federaala jala galchuuf raggasifamee jiru kun''DUULA GENOCIDE'' Waliin wal madaaludha waan ta'eef gaaffiiwwan armaan gadii akka bu'uura ka'umsaatti dhiyeeffachuun akka guutummaa Oromiyaatti sagalee Mormii dhageesifachuun dirqama uummata Oromoo ta'ee jira.

Xalayaa iyyannoo keenyaa kana gaaffiiwwaan mirga abbaa biyyummaa waliin wal-qabsiisuun uummata keenyaa haala rakkisaa keessa jiruu fi Oromiyaa diigamaa jirtuuf waardiyyaa dhaabbachuuf Iyyannoo keenyaa dhiyeeffachuuf dirqamnee jirra.

1. Caaffeen Mootummaa naannoo Oromiyaa OPDO'n Karoora Master Pilaanii Finfinnee kan mootummaan EPRDF/TPLF Oromiyaa ittin diiguuf qopheeffate hojii irra olchuuf tooftaa haaraa labsii Magaalaalee Oromiyaa jedhu itti dabaluuun akaakee Master pilaanii Finfinnee kan jabeessuu fi saffisaan karooricha hojii irra olchuuf kan oluu Caffeen Oromiyaa murtii dabaa kan duula labsii duguuginsa sanyii (genocide)n wal gitu uummata Oromoo fi Oromiyaa irratti raggasisuun yakka uummata qe'ee irraa buqqisu, kan aadaa Oromoo fi Afaan Oromoo balleessuu fi teessuma Maappii Oromiyaa cicciruu biyyarratti labsuun yakka duguugaa sanyiin wal madaaluu labiin mirkaneessuun

yakka guddaa uummata Oromoo irratti raawwataniru waan ta'eef seeraatti dhiyaachuun itti gaafatamuu qabu, Labsiin Magaalota Oromiyaa fi Master Pilaaniin Finfinnee gaaffii tokko malee akka haqamu gadi jabeessuun gaafanna!!

2. Balaa Beelaa Uummata Oromoo irra qaqqabee jiruu fi Uummata keenyaa balaa beelaan akka baalaa harcafamee waan nyaatu dhabee dhuma jiruuf itti gaafatamaan mootummaa EPRDF/TPLF Oromiyaa saamaa jiruu fi OPDO uummata Oromoo saamsisaa jirtu ta'uu ni hubachiifna. Oromiyaan badhaatuudha dhimmi uummatni Oromoo balaa beelaan dhuma jiruuf mootummaa aantummaa uummataa Oromoo qabuu fi wabii uummataaf dhaabbatu dhabuu fi uummata keenyaa misoomsuu dhabamuu irra uummatni keenyaa balaa beelaan gaaga'amaa jiraatuuf iyyachuuf dirqamnee jirra. Dhaabbileen gargaarsa Addunyaa uummata keenyaa balaa beelaan dhuma jiruuf akka dirmannaan atattamaa itti fufinsaan godhamuuf jabeessinee uummataa keenyaaf iyyannoo dhiyeesina.

3. Bara darbe Ebla 11/2014 irraa eegaluun gaaffii mirgaa fi dimookiraasii karaa nagaan barreeffamaan dhiyeeffaneef aangawootni sirna EPRDF/TPLF/OPDO'n yakka ajjeechaa duguuginsa sanyii (genocide)n wal gitu uummata Oromoo irratti labsuun uummata karaa nagaa sirna abbaa irreen mormaa jiru jumlaan ajjeessan, hidhatti guuran, barnoota irraa ari'atan, manguddoo ganna 80 hanga daa'ima ganna 7tti utuu bira hin darbiin guyyaa saafaa yakka gara jabeenyaan guutameen dhukaasanii ajjeessaniif to'annoo jala oolfamanii hatattamaan seeraatti akka dhiyaatan irra deebi'uun gaafanna!!

4. Yaaliin magaalawwan gurguddoo Oromiyaa naannawaa Finfinnee kanneen akka: Bushooftuu, Dukam, Aqaaqii Qaallittii, Sandaafaa, Laga-Xaafuu Laga-Daadhii, Sululaa, Buraayyuu, Hoolotaa fi Sabbataa bulchiinsa Finfinnee jala galchuu fi magaalawwan Oromiyaa kanneen akka Adaamaa, Shaashamannee, Walisoo, Jimmaa, Mattuu, Naqamtee fi Amboo illee to'annaa mootummaa Federaalaa fi bulchiinsa magaalaa Finfinnee jala galchuuf shirri guddaan Oromiyaa irratti raawwatamaa waan jiruuf, mootummaan 'EPRDF' akeeka kana akka hatattamaan nurraa dhaabuu gaafanna!!

5. Gurgurtaan lafaa maqaa Investimeentii fi Liizii jedhuun mootummaa amma aangoo irra jiruun Oromiyaa keessatti babal'chuun Uummata keenya qe'ee fi qabeenya dhabsiisuun abbaa biyyummaa fi qe'ee uummata Oromoo sarbaa waan jiruuf, keessattuu, naannawa Finfinneetti uummanni keenya qe'ee fi qabeenya isaanii irraa buqqifamuun jiruu fi jireenyaan dararamaa waan jiraniif, akeekni kun uummata keenya irraa akka dhaabbatu gaafanna. Kanneen qe'ee fi qabeenya isaanii irraa buqqa'aniifis beenyaa guddaan kanfalameefii qe'ee isaanii fi lafa isaaniitti akka deebi'an gadi jabeessuun gaafanna!!

6. Mirgi dimookiraasii fi namummaa uummata keenyaaf akka kabajamuu jala murree akeekkachiifna!!

7. Yakka shororkeessummaa fi Maqaa Siyaasaan Uummanni Oromoo yeroo irraa gara yerootti jumlaan hidhaatti guurame manneen hidhaa biyyattii keessatti dararamaa jiru haalduree tokko malee akka hiikaman ni gaafatna!! Yakka sobaan Oromoo hidhuu fi murtii sobaa irratti dabarsuun uummata shorokeessuun uummata keenya irraa dhaabbachuu qaba jenna!!

8. Uummanni Oromoo akka baay'ina isaatti, akka qabeenyaa isaa fi bal'ina lafa isaatti gama siyaasaan qoodannaan aangoo sirna 'EPRDF' keessatti qabu xiqqaa fi qaanfachiisaa waan ta'eef,

bulchiinsii sirna dimookiraasii dhugaan dhaabbatee, uummata keenyaaf qoodannaan aangoo siyaasaa madaalawaan kennamuufii akka qabu beeksifna. Mirgi abbaa biyyummaa uummata Oromoo kabajamuu qaba. Uummanni Oromoo gita bittaa kamiyyu jalaa ba'ee ofiin of bulchuu qaba. Mirgi qe'ee fi abbaan qabeenyummaa isaa mirkanaa'uu qaba jennee jabeessinee gaafanna!!

9. Biyya dimookiraasiin hin jirreefi mirgi namoommaa ukkanfamuun afaan qawwee qofaan bultu keessatti filmaata haqa qabeessaa fi dimookiraatawaa ta'e gaggeessuun hin danda'amu waan ta'eef maqaa filannoo waliin dha'insaa fi sobaan mootummaan EPRDF, jecha dimookiraasii fayyadamuu malee gochaan isaa faallaa dimookiraasii waan ta'eef adeemsii filannoo sobaa daheeffachuun Addunyaa biyya lafaa gowwomsuun umrii bittaa abbaa irrummaa dheereffachuuf yaaliin EPRDF gaggeessa jiru Addunyaa dimookiraasii fi mirga ilma namaa kabajjuuf kallatti hundaan saaxilamee, Filannoo sobaan daldaluun dhaabbachuu qaba. Gama addunyaan deeggarsii Filannoo sobaaf godhamu dhaabbachuu qaba. Biyyattii keessatti yoo nagaa fi Dimookiraasiin barbaachisee Mootummaan Ce'umsaa hundeeffamee bu'uurri dimookiraasii dhugaan hundeeffamee Filannoon dhaabbilee siyaasaa biyyatti hundaa kan bilisummaa sabaa isaanii fi walabummaa biyyaaf dhaabbatan, kan kabajamuu mirga dimookiraasii fi mirga namoommaaf falman kan hirmaachisuu filannoo dhugaadhaaf haalli akka mijeeffamu gadi-jabeessinee gaafanna!!

10. Humnootni tikaa, waraanaa fi milishootni mootummaa EPRDF'n hundeeffamanii bu'aa mootummaa Wayyaanee qofa tiksuu qofaaf dhaabbatan hatattamaan akka diigaman jabeessinee gaafachuun; humnootni tikaa fi qaamoleen nageenya sabaa fi sablamoota biyyatti eegan gartuu/leellistummaa kam irraa iyyuu bilisa ta'an hundeeffamuun nageenya uummataa fi biyyaaf akka dhaabbatan ta'ee gaaffii mirgaa abbaa biyyummaa, dimookiraasii, fi namummaa akka tiksan akka godhamu jabeessinee gaafatna!!

11. Lafti kan qotee bulaa ta'uu qaba. Uummatni Oromoo fi lammiileen cunqurfamoon sabaa fi sablamootni biyyattii lafa qabeenyaa isaanii irraa haala fedheen iyyuu dirqisifamanii buqqifamuu hin qaban. Dhiibbaan mootummaan EPRDF bifa kamiinuu irratti godhuu akka dhaabbatu gaafatna.

Kanaafuu, nuti dargaggoonni Oromoo Yuunibarsiitii **Harammayyaa** qabxiileen jajjaboon armaan olitti tarrifaman akka mootummaa gabroomfataa saba keenya hakuuca jiru kanaan akka hojiitti hiikamaniif jecha, wareegama fedheyyu baafnee qabsoo hadhaawaa gochuuf waan murteeffanneef, jarmiyaaleen siyaasaa fi waldaaleen hawaasa Oromoo hundii fi jarmiyaaleen siyaasaa fi waldaaleen sabaa fi sablamoota cunqurfamoo biyyatti hundi nu cina dhaabbaachuun akka falmattan jabeessinee gaafatna. Dhabbiileen mirgoota namummaa addunyaa fi mootumootni gamtoomanii kanneen sirna giloobalayizeshiinii keessatti hirmannaa guddaa qabdaniif fi bulchiinsa dimookiraasii babaldhisa jirra jettan akka nu cinaa dhaabbachuun mootummaa abbaa irree EPRDF irra qoqqobbii siyaasaa fi dinagdee kaayuudhaan dhiibbaa feesisu akka gootanii fi uummata keenya balaa beelaan dhumaa jiruuf dirmannaa itti fufinsa qabu akka gootan jabeessinee gaafachuun gaaffiiwwan keenya kana hubachuu fi qaama dhimmi isaa ilaalu qooda fudhachuun deebii sirriin akka nuuf kennamu barbaadna jechuun iyyaannoo keenya kabajaan dhiyeeffanneera!!

Barattoota Oromoo Yuunibarsiitii Harammayyaa

Garagalcha:

Uummata Oromoo Hundaaf

Jaarmiyaalee Qabsoo Bilisummaa Oromoo Hundaaf

(Dhaabbilee mormitoota Mootummaa ERDF)

Bulchiinsa Mootummaa Naannoo Oromiyaatiif

Koomishinii Poolisii Oromiyaa fi Dhimmoota Nageenyaa Oromiyaaf

Bulchiinsa Godina Harargee Bahaa fi Komishinii Poolisii Godina Harargee Bahaaf,

Dhaabbilee Mirga Namummaa Biyyattiif, Afrikaa fi Addunyaaf

Dhaabbilee Gargaarsaa Idil- Addunyaa Hundaaf!!